

Sngewsih kthang ka SSA, MCA, SCA ia ka jingduh noh kynsan ia u bah Dister Marbaniang



SHILLONG, Iaiang 18: Ka khubor kaba sngewsih ia ka Meghalaya hadien ba ka la duh noh ia u wei na ki nongshakri ba ju kyntiew ia ka kam ialehkai, bah Dister Marbaniang uba la khlad noh na kane ka sla pyrthei ha ka miet sngi Thohdieng na kadaw jong ka jingjia aksiden ha ka 11 tarik iaiang bad hadien ba la shah sumar ha NEIGRHMS.

Ka jingkhlahd noh u bah Dister Marbaniang ka long ka jingduhnong kaba khraw ia ki jingialehkai kriket bad phutbol ha Meghalaya.

Ha ka jingialang sngewlem kaba la pynlong mynta ka janmiet ha ka por 4 baje, ba la ialam khmat da u President, u Bah Banteidor Lyngdoh uba dei ruh u MLA ka Mawkyrnew Constituency, kum shibynta ban pynpaw ka dak ka jingsngewlem ia ka jingkhlahd noh jong u Bah Dister Marbaniang.

Na ka liang ki dkhot ka SSA ki la pynlong ka jingsngap jar kaba 2 minit. Ki la pynpaw ruh ia ka jingduh kaba khraw ha ki bynta ki kam ialehkai ha ka jylla.

Ka jingkhlahd noh u Bah Dister shisha kan pynblaw ia ka sur sawa ha SSA Stadium ym tang kata ia ka jingnoh synniang kaba shitrhem jong u ha kaba iadei bad ki kam ka Shillong Sport Association, la bynrap Bah Banteidor.

La iathuh ba u Bah Dister u mynsaw jur ha jingjia aksiden ha ka 11 tarik u Iaiang 2026 bad u khlad noh ha ka 17 tarik Iaiang 2026 kumba 11.30 eiei mynmiet. Na ka liang ka Association hadien ka Condolence meeting, ki lah leit ban sngewlem ia ka iing ka sem u Bah Dister kaba ha Nongrah.

Ha ka por ba u la khlad noh, u bah Marbaniang u bat kum u President jong ka East Khasi Hills Cricket Association, kaba ju trei ban pyrshang kyntiew ia ka jingialehkai kriket ha ki distrik bapther bapther shabar jong ka nongbah Shillong. Dei tang ha ka 04 tarik u iaiang ba ka EKHCA ka la rakhe ia ka jingpynkut ia ka lympong ialehkai District T20 Championship jong ki shynrang.

U bah Dister Marbaniang u la long ruh kum u Manager na ka bynta ki katto katne ki kynhun ialehkai jong ka Meghalaya Cricket Association, kynthup haduh ka kyrdan Ranji Trophy.

Nalor kata, u la long u bried uba kongsan ha ka phutbol jong ka thaini. U bah Dister Marbaniang ula iatreilang bad ka Royal Wahingdoh FC ha ka por ba ka dang kiew shaphrang bad iohrung sha ka I-League ha u snem 2014-15 bad u la iaineh bad ha ka ki por kiba eh jong ka klob tad haduh ba kan da wanphai sha ka jinglong Wahingdoh SC. Ha kane ka por ba u khlad u la long ruh u Sports Secretary jong ka Shillong Sports Association. Kham bun sien dei ka sur jong u kaba ju iohsngew haba pynbna ha ka por ba pynlong ia ki jingialehkai Shillong Premier League bad kiwei kiwei.

Halor kane ka khubor kaba sngewsih, na ka liang jong ka Shillong Cricket Association, kaba la pynbna paidbah ia ka jingkhlahd noh jong u bah Dister Marbaniang, ka la phah ia ka khubor sngewlem sha kiba haing hasem bad ki paralok ba iajan.

“Da ka jingsngewsih kaba khraw bad ka dohnud kaba khia ngi pynntip sha baroh ki dkhot ia ka jingkhlahd noh jong u bah Dister Marbaniang u President ka East Khasi Hills District Association. Ngii pynpaw ia ka jingsngewlem sha kiba ha iing ha sem, ki paralok, bad kiba iaid ba thoini jong u ha kane ka por kaba eh. Ai ba ka mynsiem jong u kan shongthait ha ka jingsuk bynjukut,” la ong u President ka SCA bah Peter Mac Kharsawian ha ki rynsan Social Media.

Kumjuh ruh na ka liang u President barim ka MCA bad SCA u Naba Bhattacharjee u la ong, “Nga sngewsih bad sngewkhia jur ia ka jingkhlahd noh jong u Bah Dister Marbaniang. Ngii dang mutdur ba kum u nongiakhun un lah ban lait na ka jingma jong kane ka jingjia aksident.”

“Ngi la iatrei lang ha Shillong Cricket Association naduh u snem 2006 bad nangta ha Meghalaya Cricket Association tad haduh mynta dangshen. U la long u dkhot uba don shisha ka thong bad uba aiti lut ha kaba kyntiew ia ka jingialehkai kriket ha ka jylla jong Ngi. Kum u President nongseng jong ka East Khasi Hills District CA u la don ka bynta kaba kongsan ban rah ia ka kriket sha ki jaka bapther bapther jong ka District. U la shakri ha ki kyrdan bapther bapther ha ka MCA khamtam kum u Manager na ka bynta ka kynhun ialehkai Senior.”

Uwei pat u bried uba la iatreilang bad u bah Dister Marbaniang ha kaba iadei bad ka jingkyntiew ia ka kriket naduh tynrai u dei u Secretary barim ka MCA bad SCA-bah Gideon Kharkongor. “Ka long kaba sngewsih shibun ban duh noh ia u paralok bad uba iatrei ryngkat ha SCA & MCA. Arphew snem ha kaba pynroi ia ka kriket ngi la iaid ryngkat shaduh ki jaka kyndon jong ka jylla. Ka jingiaid lynti kaba khatdoh jong u ka dei ka Cricket Mission ha Sohra. U Blei un nang kyrkhu ia ka longiing jong u,” u la ong.

U General Secretary ka Meghalaya State Olympic Association u bah Finely L Pariat ruh u la pynpaw ka jingsngewlem halor katei ka khubor. “Ka khubor kaba sngewsih ia ka jingkhlahd na sngewsih jong u paralok jong nga uba nga la iatreilang ha ka Shillong Sports Association la palat 30 snem. U la long u bried uba trei shitom bha ha kano kano ka kam kaba u la bat. Ai ba ka mynsiem jong u kan shongthait ha ka jingsuk bad to U Blei un don ryngkat bad kiba haing hasem jong u ha kane ka por kaba sngewsih,” u la ong.

MSL 5: Wanphai ka Maram bad ka Lawbah na ka shi kol ban khur ia ka jingjop

SHILLONG, Iaiang 19: Ka Maram FC ka la jop lynter ia ki jingialehkai jong ka ha ka lympong 5th Meghalaya State League, da kaba jop da 4-1 kol hadien ba ka la wanphai na ka shi kol pyrshah ia ka Balmanduri FC ha ka Group G ha Williamnagar ha ka sngi Saitjaiin.

Ha kawei pat ka jingialehkai kaba la long ha kajuh ka sngi, ha ka Group F, ka Lawbah SC ka la khur ia ka jingjop da 3-2 pyrshah ia ka Umlakro SC ha Mairang.

Ka Maram kaba dei ka klob ialehkai jong ka Tura District Football Association, ka la jop da 3-2 kol pyrshah ia ka A'chik SCO Rongjeng ha ka jingialehkai ba nyngkong bad ha ka sngi Saitjaiin ka la jop da ka jingkhlei kaba kham bun kol pyrshah ia ka Balmanduri, kaba dang iakhun ia ka MSL kaba nyngkong jong ka.

Ha ka jingialehkai ka Balmanduri ka la ioh ban lamkhmat ha ka minit kaba 40 lyngba u Ganapati Rabha, hynrei ha ka kylla miet ka



Ka kynhun ialehkai jong ka Maram FC. (Dur : Synniang)

Maram ka la wanrah ia ka jingialehkai kaba kyrpang ban thep saw tylli ki kol ba la wan lyngba u Santosh Teron (51'), Bris Taro (66') bad u Jakchim K Marak (84', 88').

Ka la jan long kumjuh ha Mairang, ha kaba ka Umlakro ka la pynkhihjar nyngkong lyngba u Georgesteven Thangkhiw ha ka minit kaba 21. Pynban tang haphor ar minit ka Lawbah ka la thep ar tylli ki kol lyngba u Mebadonbor Shangpliang (40') ban pyniakhaid bad bud sa ka kol jong u Fini Frankly Ramsiej (42') ban lamkhmat shuwa

ban jam sha ka por shongthait.

Ha ka kylla miet, u Georgesteven u la pynkhihjar biang na ka bynta ka Umlakro (61') hynrei tang hadien 20 minit u Kitborlang Sohtun (81'), rangialehkai ba mih bujli jong ka Lawbah ha ka kylla miet, u la pynthikna ia ki lai point da kaba thep ia ka namtam.

Ka MSL kan wanphai biang ha kane ka sngi Nyngkong da phra tylli ki jingialehkai, ha kaba baroh kin sdang ha ka por 3 baje nohphai sngi.

Ka prokram ialehkai ha kane ka sngi Nyngkong:

- Group A (Shillong SSA Stadium) - Umkaber SCC vs Nongkseh SSC
- Group B (Shillong MFA Ground) - Mawphu SC vs Nangkiew Irat SC
- Group C (Amlarem) - Lamin XI SCC vs Mawlai SC
- Group D (Khliahriat) - Ladthadlaboh SC vs Jalaphet Pyrdung SC
- Group E (Wahiajer) - Lamyrsiang SCC vs Shillong Lajong FC
- Group F (Mairang) - Mishon SSC vs Umlakro SC
- Group G (Williamnagar) - Attong Matgrik FC vs A'chik SCO Rongjeng
- Group H (Mawkyrwat) - SS Umdang Pyllun vs Rangdajied United FC

Shongshit ka jingrakhe dap 50 snem ka NSSCC

Nongstoim, Iaiang 19: Kum shi bynta ban pyniaid shakmat ia ka jingrakhe dap 50 snem lane Golden Jubilee, ka Nongpyndeng Sport Social & Cultural Club (NSS&CC), ka la pynlong ia ka lympong ialehkai Futsal ha ki kyrdan bapther bapther, kiba kynthup ia ka Under-10, Under-14, Open Category bad Veteran bad kumjuh ruh ka lympong Futsal na ka bynta ki kynthei. Ia katei ka lympong la pynlong ha Sankine Futsal Ground, Nondein’.

Ki don baroh haduh 33 tylli ki team kiba la iashim bynta ha katei ka lympong. Kine ki kynthup 16 team ha ka Open Category bad Veteran, 8 team ki kynthei, 5 team ki khynnah shynrang ba hapho 14 snem, bad 4

team ki khynnah shynrang kiba hapho 10 snem.

Ia ka lympong jong ka Open Category jong ki kynthei bad shynrang la wan ban plie pyrda u Commandant ka 4th MLP Battalion Sohpiian, u Bah VDS Rymbai kum u Rev.TT Diengdoh kum u symbud kongsan, ha ryngkat ka jingiadonlang ki nongialam jong ka Club ba kynthup ia u Dr. L.L Mawzor Secretary, u Convener ka Golden Jubilee Futsal Tournament Bah Rockfellar Dkhar, u Bah Yoophi Symbalai trai ka Sankine Futsal, ki Rangbah Dong na 9 tylli ki Dong jong ka shnong, ki nongialehkai, ki khun samla bad kiwei pat.

Ha katei ka sngi, la kham pynphuh pynphieng shuh

shuh ia ka jingialang da ki jingshad bad jingrwai ba la pyni da ki khynnah samla napho shong.

Haba ai jingkren ha katei ka sngi, u Bah VDS Rymbai u la ong ba u sngew kmen ban iohi ba ka Club ka don ia ka jingthmu ban kyntiew ia ki samla lyngba ki kam ialehkai sport.

U la kdew ba ka sport ka kyntiew ia ka disiplin, ka iarap ban lait na ki jingmlien ba sniew bad ka pynkhlaiin ia ka met ka phad bad wanrah ruh ia ka jingiatylli. U la pynpaw ruh ia ka jingkyrmen ba kane ka lympong kan wanrah jingmyntoi ia ka shnong ka thaw bad kan iarap ia ki samla ban nang kiew shaphrang ha ka jingim jong ki.



Pynliem ka Real Sociedad ia ka Atletico Madrid lyngba ka penalty ban rah ia ka Copa del Rey

SEVILLE, Iaiang 19: Ka Real Sociedad ka la pynliem noh ia ka Atletico Madrid ha ka penalty shootout ban pynskhem ia ka khusnam lahdud kaba saw jong ka kynhun ha ka Copa del Rey.

Ka Sociedad ka la rah khatdud ia kane ka Cup ha u snem 2021, ha ka por ba ka phainal jong u snem 2020 la pynslem bad la pynlong ruh ha La Cartuja Stadium ha Seville.

Kane ka jingiakhun phainal ka la ioh ia ka sdang kaba paka, ha kaba ka Sociedad ka la pynkyndit ia ka kynhun jong u Diego Simeone da kaba thep ia ka kol kaba stet tam ha ka phainal jong ka Copa del Rey tang hapho 14 sekon, hadien ba u Ander Barrenetxea u la thep da ka khlieh ia ka bol pashat jong u Goncalo Guedes.

U Ademola Lookman u la pyniakhaid shipor na ka bynta ka Atletico ha ka minit kaba 18 hynrei u Mikel Oyarzabal (45+1’P) u la pynneh pynsah biang ia ka kol lamkhmat jong ka Sociedad ha ki minit pynjan shuwa ban jam sha ka por shongthait na ka penalty, kaba la ioh hadien ba u nongap kol u Juan Musso u la kum pynur ia u Guedes katba u dang leit ban kyndat ia ka bol sha jngai.

Hynrei ka Atletico ka la pynkhlaiin ia ka jingialehkai jong ka ha ka kylla miet bad ka la ioh ia ka bai nong na ka bynta ka jingpyrshang jong ka lyngba u Julian Alvarez (83’) kaba la pynbor ia ka jingiakhun sha ka extra time. Baroh arliang kim shym

la lap satia ia ka kol kaba ap satang ka tie breaker ban rai ia ka nongjop, bad dei hangne ba u Unai Marrero u la khanglad ia ar tylli ki penaltt, kynthup jong u Alvarez bad Sorloth ban pynthikna ia ka khusnam lahdud kaba nyngkong na ka bynta ka kynhun naduh u snem 2020.

Na ka bynta ka Atletico Madrid, kaba don ha ka kyrdan kaba saw ha ka La Liga bad kaba sahdiem da 22 poim na ka Barcelona kaba ialam ha khlieh duh, ka jingmut jingpyrkhat kan phai noh sha ka Champions League ha kaba kan iakhun pyrshah ia ka Arsenal ha ka semi-final, ha kaba ka jingiakhun kaba nyngkong kan long ha ka 29 tarik Iaiang.

3 Klur ai ka sorkar Meghalaya ia ka Shillong Lajong ba rung sha ka Indian Football League

SHILLONG, Iaiang 19: U Myntri ka tnad Sports & Youth Affairs jong ka sorkar jylla, Bah Wailadmiki Shylla ha ka sngi Saitjaiin u la aiti ia ka song kyrshan pisa kaba haduh 3 Klur tyngka sha ka Shillong Lajong FC kum ka jingithuh ia ka jingtreiborbah jong ka haduh ban da poi sha ka rynsan Indian Football League.



Kane ka song pisa ka dei kaba ka sorkar jylla ka la pynbna ban ai ia kino kino ki kynhun ialehkai na ka jylla kiba poi sha ka lympong ialehkai kiba heh ha ka Ri kum ka Indian Football League lyngba ka CM Football Mission.

“Na ka liang ka sorkar jylla lyngba ka CM Football Mission ngi don ia ka skim ba kino kino ki klob kiba shim bynta ha ka I-League ka sorkar kan ai 3 klur tyngka. Ka Shillong ka la rung lypa kumta kane ka dei ka khubor ia kiwei kiwei ki klob ba lada ki rung sha ka

I-League kin ioh ia ka jingkyrshan pisa kaba 3klur tyngka,” u la ong haba kren hadien ba la dep ban aiti ia katei ka song pisa.

Ha kajuh ka por u la ai ruh ka jingkitbok ia ka kynhun ba kan nang lah ban leh bha shuh shuh nangne shakmat ban rah ia ka burom jong ka jylla ha ki lympong iakhun kiba heh ha ka Ri.

Katba na ka liang u President jong ka Meghalaya Football Association (MFA), Bah Hamlet Dohling u la iathuh ba kane ka jingkyrshan pisa kaba ka

sorkar ka ai sha ki klob kiba rung ha ka I-League kan long kum ka jingai mynsiem ia kiwei pat ki klob nalor ba ka jylla ka la don lypa ia ki rangialehkai kiba kynsai suda.

Ia kane ka jingkyrshan pisa, u Myntri u la ai ha ka sngi ba ka Shillong Lajong FC ka iakhun pyrshah ia ka Aizawl FC ha madan JN Stadium Polo. Kane ka kynhun ialehkai ba kynsai na ka jylla ka la khur ia ka jingjop kaba don burom da kaba ioh ban pynliem haduh 6-1 kol ia ka Aizawl ha kane ka janmiet.

IFL 2025-26: Pynkut ka Lajong ia ka Stage 1 da ka namjop ia ka Aizawl

SHILLONG, Iaiang 19: Ka Shillong Lajong FC ka la pynkut ia ka jingialehkai ba khatdud jong ka ha ka Stage 1 jong ka lympong Indian Football League 2025-26, da ka jingjop kaba khraw ha kaba ka la pynliem noh ia ka Aizawl FC da 6-1 ha madan First Ground-SSA Stadium, Polo ha ka janmiet jong ka sngi Saitjaiin.

U Tremiki Lamurong (87', 90'+4) u la pynkhihjar ar sien na ka bynta ka Lajong kaba iakhun hala iing watla u la mih madan kum u nongbujli ha ka kylla miet, katba u Phrangki Buam (26'), u Everbrightson Mylliempdah (45'), u Lamlallian (67’P) bad u

Gladdy Kharbuli (70') ki la thep mar kawei. U Lalhriatpua Lalrinfela (50') u la pynphai ia ka shi kol jong ka Aizawl.

Ka jingjop ka la kyntiew shipor ia ka Shillong Lajong ha ka kyrdan kaba ar ha ka miej, da kaba kama 17 point na ki khyndai tylli ki jingiakhun. Katba ka Aizawl, da ka jingshah rem, ka la hiar sha ka kyrdan kaba hynniw, kaba la pynthikna ia ka kyrdan jong ka ha ka wat iakhun ban lait na ka jingshah pynhiar kyrdan.

U Coach jong ka Shillong Lajong u Birendra Thapa u la wanrah tang kawei ka jingkylla ha ka kynhun ba sdang, da kaba sdang ia u

Gladdy Kharbuli ha pdeng madan ha ka jaka jong u Abelson Jachi.

Ki rangialehkai jong ka lajong kiba la mih madan ha ka jingialehkai ba khatdud jong ka Stage 1: Ranit Sarkar (GK), Kitboklang Khyriem, Rudra Ved, Saveme Tariang, Ephraim Lalremtuanga (sub Abhay Gurung 90'), Kenstar Kharshong, Damaitphang Lyngdoh (sub Maxderidoff Wahlang 90'), Gladdy Kharbuli (sub Overkindness L Mawnai 84'), Lamlallian, Everbrightson Mylliempdah (sub Jakob Vanlalhimpuia 84'), Phrangki Buam (sub Tremiki Lamurong 78').

Pynhap pyrda ia ka Annual School Sports Meet 2026 bad plie thymmai ia ka Arts Stream ha MAHSS Rangmaw

RANGMAW, Iaiang 19: Ka Modern Academy Higher Secondary School, Rangmaw (MAHSSR) ka la ioh ban pynhap pyrda noh ia ka Annual School Sports Meet 2026 hapheng ka jingiphuh iphieng bad ka jingkmem jong ki khynnah skul ryngkat ki nonghikai bad ki paidbah shnong.

Ha kajuh ka sngi, la ioh ruh ban plie paidbah ia ka Arts Stream na ka bynta ki khynnah skul, kaba la wan ban pynjanai shuh shuh ia ki lad pule nalor ka Science Stream kaba la don lypa ha kane ka skul. Kane ka jingioh plie ia ka Arts Stream ka long shisha kum ka jingkyrkhu kaba khraw ia ki khynnah skul jong ka shnong Rangmaw bad ki shnong ba marjan, namar kan plie lad thymmai ia ki ban jied ia ki bynta pule

kiba ki sngewtynnad bad kiba ai jingmyntoi ha ka lawei.

Haba kren ha ka jingialang, u bah Renikton Lyngdoh Tongkhar, MLA ka Mawkyrwat Constituency u la ai ka jingiaroh na ka bynta ki khynnah kiba la lah ban pyni ia ka jinglah jong ki ha ka ban iashimbynta ha ki jingiakop bapther bapther la ka long ha ki jingiamareh, ki jingrwai, jingshad bad kiwei de ki jait program ba la pynlong ha kane ka Annual School Sports Meet.

Ha ka juh ka por u la ai ruh ka jingiaroh ia ka jinglah jong ki khynnah skul ha ka ban pynleit jingmut ha ki jingpule khamtam eh lyngba ka jingpynbit jong ki ha ka ban ia kren da ka ktien phareng bad kren ruh da ka ktien hindi. Haba kren ha kaba ia dei bad ka jinglah jong

kane ka skul ba nalor ka Science Stream mynta pat ka la lah ban plie paidbah sa ia ka Art Stream ha kaba kane kan sa long sa uwei pat u maw jam ban pynjan bad pynjanai ha ka liang ka pule puthi jong ki khynnah pule kiba kwah bteng ia ka jingpule ha ka jong ka shnong.

Ha ka bynta jingialehkai, kine ki long ki nongjop kiba la wan shakmat kata Best Participant dei u Wallambiing Jyrwa, Best March Past dei ka Green House bad Best House dei ka Blue House.

Ha kane ka sngi kyrpang la wan ban sakhie lang da ka kong R. Sohklet, DSEO, South West Khasi Hills District, u bah Drus Lyngdoh, u bah Jeslanroy Nongsiej, ryngkat ki nonghikai, ki khynnah skul bad kiwei de ki riew rangbah kiba la shah khot sngewbha.

